

**Pisortaqarfinni aamma Pisortat suliffeqarfiutaanni tamani sulisussanik atorfinitsitsisarnermi oqaatsitsinnik, nunatsinni pissutsinik inooriaasitsinnillu ilisimasaqarnissap piumasaqaatitut inissisimalernissaannut periarfissat pillugit kingusinnerpaamik UPA2017-imi nassuiaammik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. (Taamaaliornikkut oqaatsitta kulturittalu ataqqineqarnissaannik inuiaqatigiit kalaallit pissusissamisoortumik piumasaqaataat atorfinitsitsinerni ataqqineqarluni atorneqalissammat)**  
(Inatsisartunut ilaasortaq Vivian Motzfeldt, Siumut)

**pillugu**

**Inuussutissarsiornermut Ataatsimiititaliap**

**siunnersuutip aappassaaneerneqarneranut**

### **ISUMALIUTISSIISUTAA**

Inuussutissarsiornermut Ataatsimiititaliap suliarinninnermini ilaasortarai:  
Inatsisartunut ilaasortaq Siverth K Heilmann, Atassut, siulittaasok  
Inatsisartunut ilaasortaq Aqqaluaq B Egede, Inuit Ataqatigiit, siulittaasup tullia  
Inatsisartunut ilaasortaq Justus Hansen, Demokraatit  
Inatsisartunut ilaasortaq Suka K Frederiksen, Siumut  
Inatsisartunut ilaasortaq Iddimangiu Bianco, Inuit Ataqatigiit

#### **1. Siunnersuutip imarisaa siunertaalu**

Pisortani suliffeqarfinnilu Namminersorlutik Oqartussanit pigineqartuni sulisussanik atorfinitsitsisarnermi oqaatsitsinnik, nunatsinni pissutsinik inooriaasitsinnillu nalinginnaasumik ilisimasaqarnissap piumasaqaataalernissaanut periarfissat pillugit nassuiaammik Naalakkersuisut suliaqarnissaat saqqummiussinissaallu siunnersuuteqartup kissaatigaa.

#### **2. Siunnersuutip Inatsisartunit siullermeerneqarnera**

Siunnersuut ataatsimut isigalugu partiinit tapersorsorneqartoq siullermeerinninnermi paarsinarsivoq, soorlutaaq oqallinnermi ersertoq Naalakkersuisut siunnersuummut tapersiisut. Kalaallisut oqaatsit inissisimanerat inuiaqatigiinnilu kalaallini aammalu pisortat allaffissorneranni kiisalu suliffeqarfinni Namminersorlutik Oqartussanit pigineqartuni

atugaanerat pillugu oqallinnermi sammivippassuit isummallu assigiinngitsorpassuit tikiqqarpot.

Nunatta aningaasaqarnikkut politikikkullu namminiilivikkiartorluni ineriartornera naalakkersuinikkut kulturikkullu naleqartitanik qanoq ittunik tungaveqarluni ingerlanneqassanersoq oqallinnermi aamma tikiqqarpoq. Partiit tamanna pillugu assigiinngitsunik takorluugaqarlutillu isiginnippot. Tassunga atatillugu oqallinnerup tamatuma isumaliutissiisummi matumani erseqqinnerusumik nassuiaatiginissaanut Inuussutissarsiornermut Ataatsimiititaliaq tungavissaqarsorinngilaq. Tamatumunngali taarsiullugu immikkoortup partiit oqaaseqaataanni Inatsisartunilu nalinginnaasumik oqallinnermi itisiliissutaasumik oqaluuserineqarnera innersuussutigissallugu. Taamaattumillu siunnersuummut isumaqataanermi akerliunermilu tungavilersuutit tungaviusut innuttaasunit Inatsisartunullu ilaasortanit ilisimalluarneqassasut ataatsimiititaliamit ilimagineqarpoq.

Taamaattumik siammasissumik tungaviusumillu oqallinneq innersuussutigalugu aalangiiffigisassatut siunnersuummi apeqqut siunnersuuteqartup taasissutissatut qulequtsiusaani oqaatigineqartoq Inuussutissarsiornermut Ataatsimiititaliamit naatsumik isummerfigineqassaaq.

### **3. Ataatsimiititaliap siunnersuummik suliarinninnera**

Nassuiaat siunnersuuteqartumit siunnersuutigineqartoq piviusunngortinneqassanersoq Inatsisartuni politikikkut isumaqatigiissutigineqanngitsoq siullermeerinninnerup takutippaa. Tamanna ataatsimiititaliamit tusaatissatut tiguneqarpoq. Siunnersuuteqartup taasissutissatut oqaasertalersugaa aallaavigalugu nassuiaammik suliaqartoqassasoq kissaatigigitsik Naalakkersuisut oqaatigaat.

Aalangiiffigisassatut siunnersuutip matuma piviusunngortinneqarnissaanut naalakkersuinikkut amerlanerussuteqartoqassappat inuit pisinnaatitaaffii Kalaallit Nunaata pisussaaffigisai, tassungalu ilanngullugu ikinnerussuteqartunut kinaassusersiorsinnaatitaannginneq eqqarsaatigalugu illersuinissamat pisussaaffiit nunallu tamalaat isumaqatigiissutaat pisussaaffiliissut attuumassuteqartut allat nassuiaammi aamma isiginiarneqarlutillu ilanngunneqartariaqarput. Tassunga atatillugu nassuiaatip Naalakkersuisunit tusarniutigineqarnissaa saqqummiunneqannginneranilu inuit pisinnaatitaaffii pillugit institutimit oqaaseqarfigineqarnissaa naleqquttuusaaq.

Aammattaaq oqaatsit pillugit inatsimmi siunertarinqartunut tunngatillugu nunap inoqqaavisa inuussutissarsiorsinnaanerit qanoq nukittorsaavigineqarsinnaanersoq nassuiaatissami ilanngunneqartariaqarpoq.

**4. Siunnersuutip aningaasaqarnikkut kingunerisassai**

Aalajangiiffigisassatut siunnersuutit piviusunngortinneqarneranni aningaasaqarnikkut allaffissornikkullu kingunerisassat siunnersuummut tunngavilersuummi nassuiaatigineqartassat Inatsisartut suleriaasianni § 33, imm. 1-imi allassimavoq. Nassuiaasiornissami Naalakkersuisut allaffissornikkut aningaasartuutissaat siunnersuuteqartumit naammaginartumik nassuiaatigineqartut Inuussutissarsiornermut Ataatsimiititaliaq isumaqarpoq.

**5. Ataatsimiititaliap inassuteqaatai**


Ataatsimiititaliami amerlanerussuteqartut Inuit Ataqtigiit Siumullu ilaasortaataasa siunnersuut akuerineqassasoq inassutigaat.

Ataatsimiititaliami ikinnerussuteqartup Atassutip ilaasortaataata siunnersuut itigartinneqassasoq inassutigaa.

Aammattaaq ataatsimiititaliami ikinnerussuteqartup Demokraatit ilaasortaataata matuma kinguliani allassimasunik oqaaseqaateqarluni siunnersuut itigartinneqassasoq inassutigaa.


Demokraatinit isumaqarpugut qanorluunniit pingaartitaqaraluaanni piginnaassutsit aallaavigalugit suliffeqarfik atorfimmik inuttassarsiuussinerminut piumasaqaateqartarnera pissusissamisoortoq. Taamaattumik isumaqanngilagut pissusissamisuussasoq Naalakkersuisut pisortaqarfiit suliffeqarfiutaanni sulilersitsinissamut politikkiannut akulerutissasoq

Taama oqaaseqarluni isumaliutissiissumilu allaasimasutut paasinnilluni ataatsimiititaliap siunnersuut aappassaaniigassanngortippaa.




Siverth K Heilmann

Siulittaasoq



Aqqaluaq B Egede

Siulittaasup tullia



Justus Hansen



Suka K Frederiksen



Iddimangiiu Bianco